

ՆՈՐ ԴՐՔԵՐԻ ՏԵՍՈՒԹՅՈՒՆ

«Ժամանակակից հայոց լեզվի լրացատրական բառարան», հատոր առաջին, Հայկական ՍՍՀ ԳԱ հրատարակչություն, 1969 թ., տպաքանակը՝ 30000:

Բառարանը լույս է տեսել Հայկական ՍՍՀ ԳԱ Հր. Աճառյանի անվան լեզվի ինստիտուտի գիտական խորհրդի որոշմամբ: Ժամանակակից հայերենի բացատրական բառարանի պահանջը վաղուց էր զգացվում և այս բառարանը այդ բացը լրացնելու առաջին փորձն է: Հատորն ընդգրկում է մոտավորապես 22—23 հազար բառ, որոնք օգտագործվում են ինչպես արևելահայ, այնպես էլ արևմտահայ գրական լեզվում: Հայ նոր գրական լեզվի արգի փուլում գործածվող բառերից ու իմաստներից բացի, «Ժամանակակից հայոց լեզվի բացատրական բառարանը» ընդգրկում է նաև անցած տասնամյակներում (սկսած XIX դարի 70-ական թվականներից) հայ լեզվավեստական, գիտական գրականության մեջ և մամուլում գործածված բառերն ու իմաստները: Հայերեն օգտագործվել են խոսքի դարձվածաբանային ոճեր, առածներ, հանելուկներ և այլն: Հատուկ ուշադրություն է դարձվել նորաստեղծ բառերի վրա, որոնք տրվում են համապատասխան բացատրություններով և օրինակներով:

Հատորի գլխավոր խմբագիրն է ՀՍՍՀ ԳԱ ակադեմիկոս Ա. Ս. Ղարիբյանը:

ԳԱՌՆԻՒ ՍՏԵՓԱՆՅԱՆ — «Ուրվագիծ արևմտահայ քառուցի պատմության», հատոր երկրորդ, Հայկական ՍՍՀ ԳԱ հրատարակչություն, 1969 թ., տպաքանակը՝ 2000, 446 էջ:

Այս հատորը շարունակում է արևմտահայ թատրոնի պատմությունը 1880-ական թվականներից: Մենագրության առաջին հատորը, որ լույս է տեսել 1962 թվականին, ավարտվում է արևմտահայ թատրոնի 1870-ական թվականների պատմությամբ: Այնտեղ հեղինակը մանրամասնորեն շարադրել է արևմտահայ թատրոնի պատմությունը սկզբից մինչև ռուս-թուրքական պատերազմի տարիները և քննության է առել հիմնականում «Արևելյան թատրոնի» հետ կապված հարցերը:

Երկրորդ հատորի ղեկավար մասը Գառնիկ Ստեփանյանը հատկացրել է ակոր վարդոյանի թատերախմբի տասնհինգամյա գործունեությանը, որի մասին մինչև այժմ կցկտուր հիշատակություններ են միայն տպագրվել: Գրքի առաջին գլուխը հենց այդպես էլ վերնագրված է՝ «Վարդոյանի թատերախումբ», որտեղ տրված է թատերախմբի ընդհանուր բնութագիրը, ապա քննվում է թատերախմբի 1868—1872 և 1872—1876 թվականների գործունեությունը, թուրքական թատրոնի սկզբնավորման հարցը և այլն:

Երկրորդ գլուխը կոչվում է «Արևմտահայերի երաժշտական թատրոնը»: Այստեղ խոսվում է ռուսումնասիրվող ժամանակաշրջանի երաժշտական կյանքի, Տիգրան Զուխաջյանի օպերետաների, Ս. Պենկլյանի ղեկավարությամբ գործող հայկական օպերետային թատերախմբի տասնամյա գործունեության և երաժշտական թատրոնի հիմնական ուժերի մասին:

Երրորդ «Ֆասուլաճյան թատերախումբ» գլխում նկարագրվում են այդ թատերախմբի բեմական առաջին քայլերը և ուղևորությունը դեպի Ռուսաստան:

«Աղամյանական շրջան», այսպես է կոչվում մենագրության չորրորդ գլուխը, ուր հեղինակը տալիս է ժամանակաշրջանի ընդհանուր բնութագիրը, ապա խոսում է Պետրոս Աղամյանի պոլսահայ բեմում կատարած դերերի, Արամ Վրույրի թատերական փորձերի, Աղամյանի մահվան և Քովմաս Ֆասուլաճյանի կազմակերպած ներկայացումների մասին:

Վերջին, հինգերորդ գլուխը նվիրված է «Մնակյանական թատերախմբին»: Թատերախմբի ընդհանուր բնութագիրը տալուց հետո հեղինակը այստեղ անդրադառնում է Մ. Մնակյանի 1850—1870-ական թվականների բեմական գործունեությանը, ապա օսմանյան դրամատիկական թատրոնի ստեղծման հարցին: Քանի որ հեղինակին զբաղեցնող շրջանին է վերաբերում թուրքական թատրոնի սկզբնավորումը, կապված Վարդոյանի ու Մնակյանի անունների հետ, ուստի նա ներկայացրել է այդ թատրոնի պատմությունը իր հիմնական գծերով, օգտագործելով թուրք և ռուս բանասերների վկայությունները: Մշակութային այդ երևույթը Գ. Ստեփանյանը գիտում է որպես թուրքական արվեստի զարգացման գործում հայ ժողովրդի ունեցած մասնակցության

նշանակալի արտահայտություններից մեկը, միաժամանակ հայ ե թուրք թատրոնի սերտ կապի լուրջորինակ դրսևորում:

Գ. Ն. ԳՐԻԳՈՐՅԱՆ — «Վահրամ Բաբունու փիլիսոփայությունը», Հայկական ՍՍՀ ԳԱ հրատարակչություն, 1969 թ., տպաքանակը՝ 1000, 228 էջ:

Գրքում հեղինակը կատարում է Վահրամ Բաբունու Մաշտոցի անվան մատենադարանի ձևադրերում պահվող մեկուկես տասնյակից ավելի աշխատությունների քննությունը և ցույց է տալիս, որ նա եղել է իր դարի գիտական-փիլիսոփայական մտքին լավատեղյակ և բաղմունկողմանիորեն զարգացած մտածող:

Վահրամ Բաբունին ապրել է 13-րդ դարում և եղել է Կիլիկիայի հայկական թագավորության մտավորականներից ու հասարակական-քաղաքական գործիչներից: Նա մեկն էր միջնադարյան այն մատենագիրներից, որոնց աշխատությունների մեծ մասը նվիրված է փիլիսոփայական-գիտական խնդիրների մեկնաբանմանը: Բաբունին հանդիսանում է նոմինալիստական ուղղության ամենականավոր ներկայացուցիչներից մեկը Հայաստանում և այդ ուղղության սկզբնավորողը հայ իրականության մեջ: Նրա նոմինալիզմը հիմք է հանդիսացել իմացաբանական և տրամաբանական շատ խնդիրների մատերիալիստական լուծման համար:

Մենագրությունը բաղկացած է երեք գլխից: Առաջինը նվիրված է Վահրամ Բաբունու ժամանակաշրջանի, կյանքի ու գրական ժառանգության քննությանը: Երկրորդում հեղինակը հանգամանորեն կանգ է առել Բաբունու նոմինալիզմի վրա: Բսկ երրորդ գլխում խոսվում է Բաբունու իմացաբանական ու տրամաբանական հայացքների մասին:

ՆՈՎ. ԹՈՒՄԱՆՅԱՆ — «Շեքսպիրի մասին», Հայկական ՍՍՀ ԳԱ հրատարակչություն, 1969, տպաքանակը՝ 6000, 100 էջ:

Թումանյանը Շեքսպիրի ստեղծագործություններին առաջին անգամ ծանոթացել է 1886 թվականին, երբ Պ. Ադամյանը Թիֆլիսում հանգես է եկել Համլետի դերակատարումով: Մեծ բանաստեղծը այնքան է հրապուրվել շեքսպիրյան կերպարներով, որ նրանց ազդեցությամբ սկսել է գրել գրամաներ, սակայն գրած դրամաները ոչնչացրել է, որովհետև իր իսկ խոստովանությամբ՝ «Շեքսպիրի գրածների նման չէին դուրս եկել»:

Շեքսպիրի մասին» այս գրքույկում ամփոփված են Հովհ. Թումանյանի տարրեր ժամանակներ և տարրեր առիթներով գրած հոդվածները, ինչպիսիք են՝ «Համլետ» ողբերգությունը, «Շեքսպիր», «Շեքսպիր, Համլետ», «Համլետի» չարչարանքի շարաթր Թիֆլիսում» և այլն:

Աշխատությունը բացվում է Ա. Ինճիկյանի ընդարձակ առաջաբանով, խմբագիրն է Թուրբեն Զարյանը: